

## 14. Korrika. Euskalduna naiz eta harro nago!

Korrikaren 14. edizioa 2005eko martxoaren 10ean hasi zen Orreagan, eta, 2.350 km egin ostean, martxoaren 20an amaitu zen Bilbon, “Euskal Herria euskalduntzen. Ni ere bai!” lelopean. Omendua Andolin Eguzkitza zena izan zen, beren burua euskalduntzeko erabakia hartu duten milaka pertsonen ordezkari gisara; musikan, aldiz, Afrika Bibangen “Ni ere bai” kantuaekin, soul erritmoaz egin zuten korri. Tere Irastorzak idatzi zuen lekukoak zekarren mezua.

Korrika podcast honetan jada ezaguna dugu Fermin Muguruza, eta gaurkoan ere tartetxo bat eskainiko diogu; ea, nork ez du kantu hau ezagutzen? Horixe bera esango zuten Londreseko, Txileko Santiagoko, Genevako edo Bartzelonako euskaldunek. Pixkanaka, Euskal Herrikan kanpora ere zabaltzen ari zen euskararen aldarrikapena, eta “Ziber Korrika” izena entzuten hasi ginen. Ideia horrek Euskal Herrikan kanpo daudenek Korrikan parte har dezaten ahalbidetzen du. Lehen, “Txapela buruan eta ibili munduan” esaten zen; orain, berriz, “Lekukoa eskuan eta ibili munduan”.

Bien bitartean, Euskal Herrian honako kanta hau entzuten hasi ginen. Et, et, et! Ferminen kanta ematen du, baina ez da harena; gainera, konturatu al zarete abestiaren antza eduki arren ez duela esaten “euskalduna naiz eta harro nago”? (...) 2004an —alegia, aurreko urtean—, “Irungo AEK-ko beteranoak” diskoa argitaratu zen. Bertan, hainbat taldek euskal kanta ezagunen berezko bertsoak egin zituzten eta, tartean, Jeremiah Johnson kantautorearen “Euskalduna naiz eta arraro nago” eta Afrika Bibangek “Ni ere bai” abestiak daude.

Aurreko atalean, KORRIKA KULTURALaren bekaren sorreraz mintzatu ginen; horren harira, zein izan ziren bigarren edizioko irabazleak? Bada, POK-ek aurkeztutako EUSKARAREN ZAZPI BEKATUAK lanak irabazi zuen KORRIKA-AEK Beka. Halaber, bekaren bigarren deialdi hartan, epaimahaiak ebatzi zuen EZEQUIEL lanari accesita ematea. Bide batez, Eneko Olasagasti donostiarra zegoen epaimahaikideen artean (idazle, antzerki- eta zinema-zuzendari eta aktorea da Eneko; eta, beste hainbat gauzaren artean, bi urte lehenago METXA antzezlanarekin lehenengo KORRIKA-AEK Beka irabazi zuen).

Adierazi bezala, 14. korrikak ohore egin nahi izan zien bere garaian euskalduntzeko urratsa eman zuten milaka eta milaka euskaldun berriei, bai eta bide horretan hasiak diren beste horrenbesteri; eta, asmo horrekin, erabakia izan zen Andolin Eguzkitzari omenaldia egitea. “Mila urte igaro eta...” izeneko ikuskizuna izan zen omenaldi-ekitaldiaren ardatza, non Andolin Eguzkitza zenaren bizitza erreparasatzen zen, haren zaletasunetatik eta idatzi ugarietatik abiatuta.

Gaurkoz, amaiera eman beharko diogu atalari; pixkanaka-pixkanaka, bagoaz aurrera eta, konturatzerako, 15. ediziora iritsi gara; edizio hartan, Pirritx, Porrotx eta Mari Mototsek doinua jarri zioten Korrika Txikiari. Jakin al duzue Jose Marik (Porrotx) eta Mertxek (Mari Motots) ez zekitela euskaraz umetan? Bi pailazoen gerora egin zuten euskalduntzeko hautua, gure Fermin Muguruza aski ezagunak eta Afrika Bibangek bezalaxe.

14. edizio horretan omenduak euskalduntzeko erabakia hartu duten milaka pertsonak izan zirenez, gaurko atala horiei guztiei eskaintzen diegu; eta, nola ez, baita zeuei ere! Agur, eta ondo izan!